

## ADYAYA I

### PURWAKA

#### 1.1 Dadalan Pikobet

Paribasa Bali pinaka silih sinunggil materi peplajahan ring basa Bali sane sampun kaicenin pamekasnyane ngawitin saking SD nyantos SMA/SMK indik materi paribasa Bali punika wenten ring kurikulum KTSP, kurikulum K13 miwah kurikulum merdeka dadosnyane pengresep indik paribasa Bali pastika sampun nglimbak mawinan paribasa Bali punika kaicenin ngawit saking SD, nanging sane kacingakin nenten sakadi punika dadosnyane nenten durung prasida nglimbak kari *statis* indik pangresep sisia ngeninin indik paribasa Bali, boya ja paribasa Bali sane kaicenin ring SD punika kaicenin ngawit saking kelas 4 saha kantos kelas 6, nanging Paribasa sane kaicenin kari durung akeh utawi kari akidik minekadi ring kelas 4 SD ring buku basa lan sastra punika wantah ngicenin duang soroh paribasa inggih punika peparikan saha sesawangan nenten makesamian indik soroh-soroh paribasa Bali miwah wangunnyane sane kaicenin, nanging kekirang materi paribasa Bali sane durung kapolihang ring genah SD pacang kalanturang ring SMP saha ring genah SMA ngawit ring SMP saking kelas VII kantos ring kelas IX indik materinyane prasida wenten ring buku paket udiana sastra saha ring genah SMA ngawit saking kelas X kantos ring kelas XI ring buku paket basa lan sastra Bali miwah ring buku paket udiana sastra. Paribasa Bali sane kaicenin ring sekolah punika wantah ring buku-buku paribasa Bali sane sampun kasuratang minakadi sane maparinama Ginarsa, Tinggen, ngangen parinama paribasa Bali,

Simpen nganggen parinama Basita Paribasa, Gautama nganggen prinama pralambang basa Bali. Manut para sujana ring Bali paribasa Bali punika kabaga dados makudang-kudang soroh, Ginarsa (1984) punika mupulang paribasa Bali dados dasa (10), Simpen (2004) mupulang paribasa Bali dados nembelas (16), Tinggen (1988) merang paribasa Bali dados dasa (10), saha Gautama (2004) merang paribasa Baline dados dados kutus (8). Soroh paribasa Bali saking papahan punika sujatinnyane sane akeh ngamedalang soroh-soroh paribasa Bali inggih punika wantah Simpen sane madue kapahan soroh paribasa Bali wenten nembelas soroh (16) paribasa Bali, nanging wenten soroh paribasa Bali sane duen Tinggen sane nenten kasuratang olih Tinggen ring bukunyanne saha kasuratang olih Simpen sorohnyane sakadi sane mawasta tetingkatan miwah sesawen dadosnyane Simpen madue pahan soroh paribasa Bali pelekutus soroh (18).

Pahan paribasa Bali sane kasuratang olih para sujana punika sane kaanggen geguat ring peplajahan *materi* paribasa Bali, saha wangun-wangun sane sampun kamedalang olih para sujana punika sane kaicenin ring peplajahan dadosnyane pangresep indik paribasa Bali ngeninin indik wangun-wangunyanne puniki dadosnyane kari *statis* mawinan kari wantah nganggen gaguat ring buku punika mantan. Peplajahan paribasa Bali indik wangunyanne ring wewidangan mangkin ten wenten prasida kapolihang manut sakadi sane wenten ring buku sane kabuat para sujana manten, nanging wangun paribasa Bali punika prasida kapolihang saking kahuripan para jana sewai-wai umpami sakadi parikrama sane wenten ring Bali, sakadi ring sesolahan seni inggih punika ring wayang, bondresan, drama gong, miwah ring lagu pop Bali. Tiosan punika taler akeh taler kapanggih wangun paribasa Bali punika ring parikrama upacara ring Bali,

minakadi upacara pawiwahan, miwah upacara adat sane tiosan. Akeh sampun wangun paribasa Bali anyar sane kaicenin nanging nenten ngicalang utawi ngewewehin soroh-sorohnyane sane sampun wenten, dadosnyane peplajahan paribasa Bali ring sekolah ngeninin indik wangunnyaane prasida nyandingang saha nyingakin sareng panglimbak wangun paribasa Bali ring wewidangan pakrama dadosnyane saking kawentenan punika pastika paribasa Bali pacang *dinamis* saha akeh wangun paribasa Bali sane anyar kauningin pamekasnyane ring genah sekolah saha genah pakraman, punika mabuat pisan kaangge ngewewehin pangresep wangun paribasa Bali sane anyar.

Wangun paribasa Bali anyar lianan kapolihang ring wewidangan seni prasida kapolihang ring wewidangan *media elektronik* ring aab sakadi mangkin sane sampun kauningin akeh pisan piranti sane kaanggen mabebaosan ring jagat Bali punika. silih sinungilnyane ring kawentenan media masa sane makeh pisan kawigunannyane minakadi ngaturang gatra-gatra utawi pakeling majeng ring karma Bali. *Media masa* inggih punika piranti sane kaanggen ring sajeroning nguningayang pabesen majeng ring sang sane mireng (*penerima*) sane nganggen piranti-piranti mabebaosan, sakadi *surat kabar, film, radio* saha *televise* (Cangara, 1998: 140). *media masa* maduwe akeh kaluwihan mawinan sampun akeh wenten ring kauripan para janane saha madue kawigunan sane pinih utama pisan. Punika ngawinang *media masa* pinaka silih sinungilnyane piranti sane sampun mabuat pisan ring sajeroning kawentenan saha panglimbak basa. Sakadi silih sinungilnyane *media masa* ring radio sane nganggen basa Bali ring acaranyaane saha nagingin indik paribasa Bali minakdi wangun-wangun anyar miwah sane sampun lumrah sakadi ring acaranyaane inggih punika pramusiar sane mawasta I

Putu Pada Yasa sane makarya ring radio sane mawasta Nuansa Giri 91, 2 FM, prajana sane makarya dados pramusiar ring Radio Nuansa Giri sane mawasta I Putu Pada Yasa sane madue wasta pungkusan Pan Balang Tamak prasida ngicenin wangun-wangun paribasa anyar ri kalaning wenten parikrama siaran, indik paribasa Bali sane wenten ring pramusiar Pan Balang Tamak ri kala Pan Balang Tamak punika nyape saha ri kala wenten *telpon* saking pamiarsa sane pacang ngereh tembang saha ring pamahbah ri kala ngawitin acaranyane pastika wenten gegonjakan-gonjakan dumun ring bebaosannyane ring galahe punika Pan Balang Tamak ngicenin paribasa Bali minakadi bebladbadan, wewangsalan sareng pamiarsa, dadosnyane akeh sane seneng mirengang pramusiar punika saha akeh sampun nguningin.

Majalaran antuk panlataran ring arep, kawentenan radio utaminnyane radio sane wenten ring wewidangan Kabupaten Buleleng sane kari wenten ring mangkin minakadi Radio RRI, Guntur, Citra Bali FM, Singaraja FM, Nuansa Giri FM. Panilik meled nilikin saha nyelehin indik kawentenan radio sane nganggen basa Bali saha ngicenin wangun-wangun paribasa anyar. Panilik pacang nyelehin indik kawentenan paribasa Bali ngeninin indik wangun-wangun anyar ring paramusiar Pan Balang Tamak radio Nuansa Giri 91, 2 FM ring acara cemara giri, santukan ring pramusiar Pan Balang Tamak Puniki maduwe indik keluwihan dadosnyane pateh sareng pramusiar-pramusiar lianan nanging sane menojol saha unik ring pramusiar Pan Balang Tamak minakadi ri kala siarannyane Pan Balang Tamak setata ngicenin wangun-wangun paribasa Bali anyar miwah wangun paribasa Bali sane sampun lumrah, lianan punika Pan Balang Tamak punika nganggen basa Bali dialeg Buleleng nenten alus miwah nenten kasar sane

danganan antuk karesepang majeng pamiarsa ri kala magegonjakan ring ambara majeng pendengar, lianan punika sane unik ring Pramusiari Pan Balang Tamak, ri kala mebebaosan punika indik bebaosannyane gangsar pisan ngucapang daging bebaosan ri kala siaranyane dadosnyane nika sane dados kaunikan sane ngawinang Pan Balang Tamak Punika akeh sane nguningin, dadosnyane yening mirengeng Pan Balang Tamak pastika *identic* sareng Nuansa Giri. Yening sahiang sareng pramusiari Radio Sane Lianan sane megenah ring wewidangan Kabupaten Buleleng boye ja wenten sane sampun nganggen basa Bali ring siarannyane minakadi ring radio Singaraja FM nanging durung wenten kaicenin wangun-wangun paribasa Bali minakadi wangun anyar miwah wangun sane lumrah sane kaangge ring bebaosannyane ri kala magegonjakan ring ambara, boye ja wantah pramusiari Pan Balang Tamak puniki sane ngicenin wangun-wangun paribasa Bali minakadi anyar miwah sane sampun lumrah, sujatinnyane yening parindikan sakadi punika prasida kabuat dadosnyane pangresep indik wangun-wangun paribasa akeh kapolihang kaangge ngwewehin ring peplajahan paribasa Bali ring sekolah miwah ring genah pakraman.

Manut sane sampun kabaosang ring ajeng, ring sajeroning tetilikan pastika wenten tetilikan lianan sane mapaketan sareng tetilikan sane pacang kamargia, pinaka tetimbang olih panilik sane pacang nglaksanayang tetilikan. Tetilikan indik seseleh Basita Paribasa sampun polih kalaksananya olih panilik lianan. Wenten makudang-kudang sujana saking program studi Pendidikan Bahasa Bali, inggih punika: (1) Subawayasa (2015) miwah (2) Ayu Era (2015) miwah (3) Budiantara (2016). (1) Subawayasa, (2015) nglaksanayang tetilikan sane mamurda “Seseleh Basita Paribasa Miwah Gunasarat Ring Lelampahan Wayang Kulit Inovatif Cenk

Blonk Belayu Sane Mamurda Abimanyu Makrangeng”. Tetilikan puniki nyutetang indik Seseleh Basita Paribasa Miwah Gunasarat Ring Lelampahan Wayang Kulit Inovatif Cenk Blonk. (2) Ayu Era (2015) nglaksanayang tetilikan sane mamurda “Seseleh Basita Paribasa Lan Kawentenan Guna Sarat Ring Daging Cakepan Drama Nang Kepod Pakardin Ketut Aryana”. Tetilikan puniki nyutetang indik Seseleh Basita Paribasa Lan Guna Sarat Ring Daging Cakepan Drama, (3) Budiantara (2016) nglaksanayang tetilikan sane mamurda “Basita Paribasa Bali Ring Album Nasi Goreng Spesial Kekawian Widi Widiana”. Tetilikan puniki nyutetang indik Pahan Basita Paribasa Bali ring album tembang Bali “Nasi Goreng Spesial” kekawian Widi Widiana. miwah Artos Paribasa Bali sane wenten ring album tembang Bali “Nasi Goreng Spesial” kekawian Widi Widiana. Saking tetiga tetilikan punika sampun wenten sane nganggen Seseleh Basita Paribasa ring Wayang Kulit Inovatif Cenk Blonk saha ring Daging Cakepan Drama miwah ring Album Nasi Goreng Spesial Kekawian Widi Widiana. Saking tetiga tetilikan punika durung wenten sane nilikin ring Pramusiari Radio Pan Balang Tamak ring Radio Nuansa Giri 91, 2 FM.

Antuk punika, panilik pacang ngambil tetilikan sane mamurda “Seseleh Paribasa Ring Pramusiari Pan Balang Tamak Radio Nuansa Giri 91, 2 FM”. Santukan saking tetilikan puniki pacang ngamedalang indik wangun-wangun paribasa anyar sane wenten ring Pramusiari Pan Balang Tamak saha sapunapi pangajahan saha kawigunannyane majeng pamiarsa pendengar Radio Nuansa Giri 91, 2 FM ring paribasa ring Pramusiari Pan Balang Tamak taler prasida madue kawigunan kaangge ngewewehin wangun-wangun paribasa Bali sane anyar mangdana paribasa Bali sayan ngelimbak ring aab sakadi mangkin.

## 1.2 Ngrereh Pikobet

Ring tetilikan puniki, panilik ngrereh makudang-kudang pikobet sane wenten paiketannyane sareng dadalan pikobet ring ajeng. Pikobet sane sampun kapolihang mapaiketan ring pidaging peplajahan paribasa Bali ring sekolah saha panglimbak paribasa Bali anyar ring pakraman minakadi: (1) Napi ngawinang paribasa Bali ngeninin indik wangunnyane kari nenten wenten panglimbak ring sekolah? (2) Sapunapi pengresep sisia ngeninin indik wangun paribasa Bali sane kapolihang ring sekolah? (3) Napi ngawinang wangun paribasa Bali ring ring wewidangan seni sakadi wayang utawi bondres saha pramusiar radio Pan Balang Tamak radio Nuansa Giri nglimbak? (4) Sapunapi indik wangun anyar Paribasa Bali sane wenten ring Pramusiar Pan Balang Tamak? (5) Sapunapi Paiketan Paribasa Bali ring Pramusiar Pan Balang Tamak sareng Pangajahan Majeng Parajana Pendengar Radio Nuansa Giri 91, 2 FM? (6) Napi Kawigunan Paribasa Bali Pramusiar Pan Balang Tamak Majeng Pamiarsa Pendengar Radio Nuansa Giri 91, 2 FM?

## 1.3 Ngwatesin Pikobet

Tetilikan sane jagi kemargiang punika kawatesin, duaning panilik pacang nureksain malih sane sampun polih karereh minakadi ngwatesin kawentenan pikobet mawinan wenten makudang-kudang parindikan sakadi kakirangan galah tetilikan, ngicen galah ring panilik sane tiosan mangda prasida nyangkepin taler maripurnayang tetilikan punika, saha parindikan-parindikan tiosan. Pikobet sane kawatesin inggih punika: (1) Napi ngawinang paribasa Bali ngeninin indik wangunnyane kari nenten wenten panglimbak ring sekolah? (2) Sapunapi

pengresep sisia ngeninin indik wangun paribasa Bali sane kapolihang ring sekolah? (3) Napi ngawinang wangun paribasa Bali ring ring wewidangan seni sakadi wayang utawi bondres saha pramusiar radio Pan Balang Tamak radio Nuansa Giri nglimbak?

#### **1.4 Bantang Pikobet**

Nganutin dadalan pikobet sane sampun kawedarang ring ajeng, bantang pikobet sane prasida kapolihang inggih punika:

1. Sapunapi indik wangun anyar Paribasa Bali sane wenten ring Pramusiar Pan Balang Tamak?
2. Sapunapi Paiketan Paribasa Bali ring Pramusiar Pan Balang Tamak Sareng Pangajahan Majeng Parajan Pendengar Radio Nuansa Giri 91, 2 FM?
3. Napi Kawigunan paribasa Bali Pramusiar Pan Balang Tamak Majeng Pamiarsa Pendengar Radio Nuansa Giri 91, 2 FM?

#### **1.5 Tetujon Tetilikan**

Malarapan antuk bantang pikobet ring ajeng, tetujon tetilikan puniki inggih punika:

1. Nyantenang indik wangun anyar paribasa Bali sane wenten ring Pramusiar Pan Balang Tamak.
2. Nlatarang indik paiketan paribasa Bali ring Pramusiar Pan Balang Tamak sareng Pangajahan majeng parajan pendengar radio Nuansa Giri 91, 2 FM.



3. Nlatarang indik napi kawigunan paribasa Bali Pramusiar Pan Balang Tamak rmajeng pamiarsa pendengar radio Nuansa Grrri 91, 2 FM.

## 1.6 Kawigunan Tetilikan

Madasar antuk tatujon tetilikan punika wenten kawigunan sajeroning tetilikan puniki prasida kakepah dados kalih luir ipun:

### 1.6.1 Kawigunan Pamucuk (*teoritis*)

Tetilikan puniki kaaptiang mangda maguna kanggen nincapang pangresep ngeninin indik wangun paribasa Bali sane anyar mangda sane kauningin nenten sane sampun wenten ring buku kemanten sane kasuratang para sujana, saha prasida nglimbakang ranah sahe khazanah materi paribasa Bali.

### 1.6.2 Kawigunan Panglimbak (*praktis*)

Wenten makudang–kudang kawigunan panglimbak tetilikan sane sida kapikolihang ring seseleh paribasa Bali ring pramusiar Pan Balang Tamak Radio Nuansa Giri 91, 2 FM minakadi:

#### a. Majeng ring Guru

Pikenohnyane majeng ring guru prasida mengaitkan indik materi paribasa Bali sane kaajahin ring sekolah sareng panglimbak paribasa Bali ring kahanan kahuripan sakala, lianan punika kaangge sarana ri kala ngicenin peplajahan paribasa Bali mangda akeh wangun sane kaicenin majeng ring sisia.

**b. Majeng ring sisia**

Pikenohnyane majeng ring sisia prasida ngewewehin malih indik wawasan ngeninin indik wangun–wangun paribasa Bali lianan sane sampun kapolihang ring sekolah mangdane paribasa sayan ngelimbak, mawinan peplajahan paribasa Bali ring sekolah punika kirang akeh sane kaicenin utawi kasuratang ring buku–buku paketnyane.

**c. Majeng panilik lianan**

Pikolih tetilikan puniki dahat kaaptiang mangda sida mabuat tur mawiguna kaanggen majeng panilik selanturnyane mangda tetilikan seseleh paribasa Bali ring Pramusiar Pan Balang Tamak radio Nuansa Giri 91, 2 FM dados kaanggen jalaran miwah gaguat sane sida mabuat ped prada wenten sane jaga nganggen tetilikan sane pateh sakadi seseleh paribasa Bali sajeroning ring radio.

